

Ekstremizmi Online

Sfidat dhe Mundësitë në Ballkanin Perëndimor

Ballkani Perëndimor përballet me një sfidë të dyfishtë si pasojë e ekstremizmit online. Platformat online po lehtësojnë shënjestrimin specifik të rajonit nga narrativa të ndryshme ekstremiste ndërkombëtare. Ndërkohë, historia dhe gjeopolitika rajonale po përvetësohen për të justifikuar veprimet dhe narrativat ekstremiste në mbarë botën. Kjo dinamikë u spikat veçanërisht në mars të vitit 2019, kur Brenton Tarrant kreu një sulm terrorist tronditës në objektet myslimane të adhurimit në Christchurch të Zelandës së Re. Ndërsa faqja e Tarrantit në Facebook transmetonte drejtpërdrejt ecurinë e sulmit, në sfond dëgjohej një këngë nacionaliste serbe e kohës së luftërave jugosllave dhe e përvetësuar së fundmi si himn nga e djathta ndërkombëtare ekstremiste. Edhe në armët e tij kishte referenca ndaj rajonit, shkarravitur me emra figurash historike nga Ballkani që i kishin bërë ballë pushtimit osman dhe inkuadronin veprimet e tij si pjesë e një rezistence paralele kundër "islamizimit".

Përfshirja e Ballkanit Perëndimor në një nënkulturë globale të ekstremit të djathtë online, të asociuar me radikalizimin e australianit Tarrant, mund të duket e çuditshme. Sidoqoftë, ky fenomen është pjesë e një tendence më të gjerë, e cila vë në dukje sfidën gjithnjë e më të madhe që paraqet përhapja e ideologjive ekstremiste transkombëtare në platformat online, si ato xhihadiste të dhunshme ashtu edhe ato të ekstremit të djathtë. Në Ballkanin Perëndimor, kjo paraqet një sërë rreziqesh specifike.

Për më shumë, shihni: Milo Comerford dhe Simeon Dukic, [*Ekstremizmi Online: Sfidat dhe Mundësitë në Ballkanin Perëndimor*](#). RESOLVE Network, 2021.

REKOMANDIME PËR POLITIKA



Të kuptojmë më mirë tablonë dinamike të kërcënimit.

Një bazë e përmirësuar të dhënash do t'i lejojë qeveritë të kuptojnë më mirë rreziqet online që lidhen me narrativat ekstremiste, keqinformimin dhe gjuhën e urrejtjes dhe të identifikojnë rrjetet kryesore të shpërndarjes së tyre, duke siguruar njëherazi që të respektohen të drejtat e njeriut dhe privatesia.



Të investojmë në ekspertizën rajonale për të adresuar terrin gjuhësor.

Ndërkohë që firmat globale të teknologjisë pretendojnë t'u ofrojnë një përvojë të njëtrajtshme dhe të standardizuar përdoruesve në mbarë botën, rregullimi efektiv i platformave kërkon njohuri të lokalizuara gjuhësore dhe kulturore.



Të shkojmë përtej moderimit të përmbajtjeve.

Konsideratat lidhur me rregullimin e platformave të teknologjisë duhet të shkojnë përtej moderimit të thjeshtë të përmbajtjeve, për të adresuar edhe amplifikimin algoritmik të mesazheve terroriste dhe të ekosistemit më të gjerë të ekstremizmit online, duke përfshirë edhe mënyrën sesi algoritmet e kërkimit dhe rekomandimeve mund të jenë duke i shtyrë njerëzit drejt përmbajtjeve ekstremiste online.



Të zhvillojmë një reagim rajonal ndaj një sfide rajonale.

Krijimi i një task force rajonale që grupon departamentet përkatëse qeveritare, ku përfshihen agjencitë ligjzbatuese dhe ato të komunikimeve elektronike, për të identifikuar kërcënimet rajonale, për të shkëmbyer përvoja dhe për të zhvilluar reagime të koordinuara, do t'u jepte shtysë përpjekjeve për të luftuar shfrytëzimin e internetit nga aktorët ekstremistë dhe terroristë.



Të krijojmë partneritet më të gjerë me shoqërinë civile dhe komunitetet lokale.

Përpjekjet në luftën kundër ekstremizmit të dhunshëm duhet të aplikojnë një qasje me përfshirjen e të gjithë shoqërisë, për të siguruar përfshirjen e komunitetit dhe fuqizimin e përpjekjeve të shoqërisë civile për të trajtuar ekstremizmin e dhunshëm, çka mund të sigurojë burime unike, rezonancë dhe besueshmëri në nisma të tilla.



Të nxisim aftësitë e qytetarisë digjitale nëpërmjet edukatës qytetare.

Nëpërmjet hartimit aktiv të kurrikulave, programeve të trajnimit të mësuesve dhe burimeve të të nxënës që japin njohuritë dhe aftësitë e nevojshme për të zhvilluar të menduarit kritik dhe për të nxitur qëndrime mendjehapura, angazhim qytetar dhe bashkëjetesë ndërkulturore, qeveritë mund të krijojnë një qëndresë më të madhe ndaj narrativës ekstremiste dhe rreziqeve të tjera në internet.

RESOLVE NETWORK

Kërkim më i thelluar | Praktikë e bazuar në informacion | Politika të përmirësuara kundër ekstremizmit të dhunshëm

www.resolvevet.org | [@resolvevet](https://twitter.com/resolvevet)

"RESOLVE" e ka selinë në Institutin e Paqes të SHBA-ve dhe mbështetet në trashëgiminë dhjetëra vjeçare të angazhimit të thellë të Institutit në komunitetet e përfshira nga konflikti.